

## Juan Jesús Chanĩmara Faafo Kirika Kenexõ Fomani

*Jesús noko nimasharaino nõ afe ìpaxanõ*

<sup>1</sup> Èkĩa Juan, ã mato kirika kenexõ fomai mã tãpinõ. Jesucristo ã õimixaki ã mato yoi mãri mã tãpisharanõ. Nã Jesucristo nõko Ifokõi tae fenakõi Nios fe iyopaonixakĩ. Akka Niospa afama mĩshti onifamatai afe iyopaonixakĩ, chipo nãmã fotoxõ noko yoiaito nõ nikamis. Oa yorakõi keskara nõ õimis. Mã õikĩ feyafaxõ nõ ramãti nõko mĩfi. Nãskakẽ noko yoiaito nikayamexakĩ ã mato yoi, noko imasharanõ nõ afe ìpaxanõ. <sup>2</sup> Apa Nios ariax nokoki Jesús ftoni. Fotokẽ nõ õikĩ feyafani. Nãfi afeskapishta nakama, nãfi nĩpanakakĩ. Apa Nios fe ikatsaxakĩ nokoki ftoni. Nãskakẽ nã nõ õia keskara nõ mato yoi. <sup>3</sup> Nõ õipaonixakĩ nõ mato yoi noko yoiaito ãfe meka. Nãskakẽ nofe rafexõ nã nõ shinãi keskarari mãri mã shinãitiro. Nios feta ãfe Fake Jesucristo shinãi keskafakĩ nõri anori nõ shinãi, nõ ato fe rafekõitiro. <sup>4</sup> Nãskakẽ ã mato kirika kenexõ fomai nã kirika kene õiax mã inimakõinõ.

*Nios xafakĩakõi ika oa luz keskara*

<sup>5</sup> Akka noko Cristo yoiai, anori ã mato yoinõ. “Oa xinĩ chai chaxaino fakishtiroma keskara, xafakĩakõi Nios ika. Afaa chaka afe rafemisma,” ixõ Cristo noko yoimis. <sup>6</sup> Akka anorima shinãi yora fetsafo iskakani: “È Nios fe rafea,” ifiaxõ a Niospa yoiai anori shinãima ãa chanĩ anorima yoi. ãfe õiti sharama xafakĩakõi ikama, fakish

keskara a Niospa yoiai anori shinãyamafi. <sup>7</sup> Nios xafakĩakõi ikakĩ, afaa pishta chakafamisma. Æfe õiti mēra oa fakish keskarama, xafakĩa sharakõi ika. Akka nõri afe rafekõixõ, nõ Æfe meka nõ mēra nanekõixõ, Niospa shinãi keskafakĩ nõri nõ shinãtiro. Nõ askara shinãx, nõ Ifofaafõ fe nõ ato fe rafetiro. Nãskax nõ xafakĩakõi nitiro, Niospa Fake Jesúsmãi noko nãxonikẽ. Æfe imĩ nõko chaka noko soaxõfafãini keyokõi.

<sup>8</sup> Akka nõ yoikĩ iskafamis: “Ë afaa chakafamisma,” iflax nõa nõ pãramemis. Nãskax nõa nõ chanĩkõimis. Nõko õiti mēra Niospa meka naneama. <sup>9</sup> Akka nõ afara chakafaxõ nõko chaka nõ soapaikĩ, nõ Nios yoiaito nõko chaka noko soaxotiro. Keyokõi noko soaxotiro noko raefakĩ, Niosmãi mēstekõi isharakõixõ. <sup>10</sup> Niospa yoimis: “Keyokõi yorafãfe chakafamisfo,” noko famis yoikõikĩ. Noko askafafiaino, “Ëkai afaa pishta chakafamisma, ã chaka shinãima,” ixõ yoikĩ nõ Nios chanĩmara faima, “Ãa chanĩra,” nõ Nios fai. Nãskakẽ Æfe meka nõko õiti mēra naneima.

## 2

### *Jesús Apa Nios noko yoixoni*

<sup>1</sup> Efe yora mĩshtichi, ã mato shinãi. Mẽ mato Jesús Ifofamaxõ ã mato fakefai. Mato fakefaxõ ã mato kirika kene fomai, mã anã afarafo chakafanõma, shinãsharata mã inõ. Askara Niospa fichipai. Akka nõ chakafaino Niospa fichipaima. Nãskakẽ nõ anã afara chakafaxõ nõ nõko Ifo Jesucristo nõ yoitiro anã nõko chaka nõ soapaikĩ, nokomãi nikaito. Noko nikaxõ Apa Nios noko yoixoni iskafakĩ: “Epa, ã ato nãxoni. Eõxõ ato chaka soaxõfe, ãto

chaka soapaikani kiki,” Apa fatiro. Nā fistimāi mēstekōi ixō, afaa chakafamisma. Nāskaxō Apa Nios noko yoixotiro. <sup>2</sup> Noko nāxoni nōko chaka noko soaxoxiki. Noko fistima, keyokōiōnoax noko nāxoni. Nōko Ifo Jesucristo noko nāxoni. Nōko chaka noko soaxōfaini nani.

<sup>3</sup> Nāskakē Cristo noko yoiai keskafakī nō nikakōixō nō tāpisharakōitiro nōmāi afe rafexō. <sup>4</sup> Yora fetsafo iskai: “Ē Cristo fe rafea,” ifiaxō āfe meka nikama, āa akikiri kētapamis, mēstekōi ikama. <sup>5</sup> Akka nō Niospa meka nikakōikī nō aō noikōi. Nāskafaxō nō tāpitiro nō afe rafekōia, Nios fe. <sup>6</sup> “Mē Nios fe rafekōiaki,” ixō yoi, a Jesús imis keskara ikāfe.

*Noko meka fena shara yoini nō nōināsharakōinō*

<sup>7</sup> Efe yora mīshtichi, ē mato yoisharakī ē mato kirika kenexoni. Na ē mato yoiai keskafakī tafakī mā mā nikamiskī. Jesús noko yoia keskafakī ē mato kenexonō. <sup>8</sup> Mā mā nikafimiskē, ē mato anā fenafakī yoinō chanīma. Jesucristo noko noikōi. Nāskari fakī nō fetsafo noikōi. Fetsafo noikī, nōko ōiti mēra xafakīakōi iki. Anā fakish keskara ikima. <sup>9</sup> Akka, “Ē Nios fe rafea ē xafakīakōi ika,” ixō nō yoifixō nofe yorafo nō noikaspamis, nōkai xafakīakōi ikama. <sup>10</sup> Akka nōroko nofe yorafo noi, nō xafakīakōi iki. Nō shināsharata nō ikax, nō anā fenotiroma. Nāskakē nō xafakīakōi iki, afaa pishta chaka shinātama. <sup>11</sup> Akka a afe yorafo noikaspaifo, afokai sharama. Fakish mēra niafo keskara. Afaakai shinākanima. Āto chaka xatekaspakani. Askafikaxō afaa tāpiafoma, fenokōiafo.

<sup>12</sup> Efe fakefāfe, māto chakafo Jesúsxō Epa Niospa mato soaxonano, nāskakē ē mato shinākī ē mato

kirika kenexoni. <sup>13</sup> Afaa oniataima Epa Nios fisti iyopaoni. Efe anifo tiito, ẽ mato kirika kenexoni, afe keskaramãki mã mã Epa Nios tâpiakĩ. Mã mã tâpixõ mã chanĩmara famiski. Naetapafãfe, matori ẽ kirika kenexoni, Satanás chakata mato afara chakafamapaiyaito mã mã finõfakĩ. Nãskakẽri naetapa tiito ẽ mato kenexõ fomai, mã Satanás chaka finõano. Efe fakefãfe, ẽ mato yoikĩ kenexona mãmãi Epa Nios tâpikẽ.

<sup>14</sup> Efe anifo tiito, matori ẽ kirika kenexona, mã mã tâpiakĩ, afaa oniyataima Epa Nios fisti iyopaoni. Naetapafãfe, matori ẽ kirika kenexona, mãto õiti kerexkõifafãi Epa Nios ãfe meka shara nikakõiyana mã mã Satanás chaka finõfakĩ.

<sup>15</sup> Akka a Niospa fichipaiyamai, nõri fichipaitiroma. Afo fichipaikĩ nõ Nios shinãtiroma. Afarafo na yora chakafãfe ãto shinã mẽraxõ shinãifo keskara afo fichipaiyamakãfe. Afo fichipaikĩ mã Nios shinãtiroma. <sup>16</sup> Akka a Nios shinãifoma nono nãmã ikafo ãa shinãkani iskamisfo: “Ëa ẽ shinãxõ nã ẽ apaiyai keskara ẽ atiro. Afara õikĩ ẽ fichipaikĩ ẽ fitiro. Ë tsoa keskarama. Ë afama mĩshti shinãi. Ea keskara tsoama,” ixõ fẽtsa yoitiro ãa chanĩkĩ. Aato Niospa meka shinãima, ãa shinãx askatiro. <sup>17</sup> Akka na afe keskararafo Niospa õikaspaifo mã afo mitokomei. Nãskatari a yora chakafãfe fichipaiyaifo mã afori mitokomei. Akka nã Niospa yoiai keskara nikakõiax nõ Nios fe nĩpanaka.

*A yora chanãaifo nõ nikatiroma*

18 Efe fakefāfe, mā chaima Jesucristo anā nāmā fotoiyoi mā nō nika. Nāskakē Jesús nāmā fotoyomanō, akka nā yora chakafāfe Cristo shināmisfoma āto xanīfo finakōia oi taei. Nāato, “Ē Cristora,” ixō noko pārapaixii. Mā mā tāpia nāato Jesús noikaspamis. Akka iskaratīa, “Ē Cristora,” ikanaifo yora ichapakōifo. Nāskakē mā nōri tāpia nā Cristo kayakōi samama fotoi. 19 Nā Cristo noikaspaifo nofe iyoafo, mā noikaspakani nomakinoax tsekeafō. Afokai noko keskarafoma. Cristo anā shinākanima, mā kachikiri faafo. Nāskax nomakinoax tsekeafono nō tāpitiro afāfekai Cristo Ifofaafoma. Akka a Cristo āto Ifokōikē nomakinoax tsekekeranafoma.

20 Akka Cristo āfe Yōshi Shara mātō ōiti mēra nanea. Nāskakē keyokōichi mā mā tāpia Niospa Yōshi Sharapa mato tāpimapaiyai keskara.

21 Nāskata Jesucristo mā tāpikī finakōiakī. Tāpixō mā mā chanīmara fakī. Nāskakē ē mato kenexoni. Nāskaxō afara mato pāraifāfe mā chanīmara faima. Mā tāpia Jesucristo ramashara anorima ato yoimisma, nāfi chanīmakōikī. 22 Yora fetsafo iskamisfo: “Cristokai Niospa nai mēraxō nīchinikeroko, akai Niospa Fakekēroko,” ixō yoimisfo. Askafakaxō Epa Nios yafi āfe Fake Jesús chanīmara fakanima. Afāfe Cristo noikaspakōikani.

23 Akka nā Cristo noikaspaiāfe iskafakani: “Jesús Niospa Fakema,” fakanax Epa Nios fe rafemisfoma. Afokai Niospa yorafoma. Akka a yoikī iskafaifo: “Jesús Niospa Fakekōi,” fakanax nāfo Nios fe rafekani.

24 Nāskakē Jesúsnoa mā nikakī taefani keskafakī, āfe meka shara shināmakiyamakāfe. Nā mā

nikakĩ taefani keskafakĩ, mã shinãmakiyamax mã nikakõisharaino Epa Nios fe ãfe Fake Jesús mato fe rafekõipakenaka. <sup>25</sup> Nãskakẽ Jesús noko iskafakĩ yoiyoni: “Ea yafi ãfe Epa mã Ifofaax, mã nofe nĩpanaka, anã mã nanakama,” ixõ noko yoini.

<sup>26</sup> Akka na yorafãfe Cristo noikaspaifo afãfe mato pãrapaikani. Mato anorima yoipaikani. Nãskakẽ ã mato yoisharakĩ kirika kenexoni mã tãpikõinõ tsõa mato pãrayamanõ anorima yoikĩ.

<sup>27</sup> Akka Epa Niospa ãfe Yõshi Shara mato inãni mato fe rafekõinõ. Nãskakẽ aõxõ mã mã tãpikõia. Mã anã tsoa yopaima mato tãpimanõ, ãfe Yõshi Sharapamã keyokõ mato tãpimakẽ. A mato tãpimanai keskara chanĩmakõ, mato pãratiroma. Nãskakẽ nikakõianã Cristo fe rafesharakõikãfe, a Niospa Yõshi Sharapa mato yoiã keskai. A Niospa Yõshi Sharapa mato yoini keskai shinãmakikakĩma Cristo fe rafesharakãfe enekakĩma.

<sup>28</sup> Ëfe fakefãfe, iskaratĩa Cristo nikakõianã afe rafekõikãfe, mã nãmã fotofaino nõ akiki meseimakai nõmã isharakõiax. Askatari nõ akiki rãfimakai.

<sup>29</sup> Mã mã tãpiakĩ Nios isharakõimiskĩ afaa chakafatama. Nã isharakõimisfo nãfo Epa Niospa imasharapakenaka ãfe fakefo inõ. Nafofi Epa Niospa fakekõifokĩ.

### 3

#### *Niospa fakefo*

<sup>1</sup> Epa Niospa noko noikõ. Shinãfã ikãfe. “Ëfe fakefora,” noko famis. Akka nõ ãfe fakekõifo. Akka nã yora fetsafãfe Jesucristo shinãifoma Nios tãpiafoma. Nãskafakĩri nokori tãpiafoma, nõ Niospa

fakefofiano. <sup>2</sup> Efe yora mĩshtichi, ea nikakãfe. Nõfi iskaratĩa Niospa fakekõifokĩ. Nãskakẽ afe keskarara chipo noko Niospa imai nõ tãpiama. Cristo fotoaito nõ õiax nã keskarakõi nõ iki, ãfe õiti keskarakõi. <sup>3</sup> Niospa fakekẽ nonori nõ yoi: “Ë Jesucristo fe ipanaka. Ë Jesús fe ikaino ãfe õiti keskarakõi ã ixii,” ixõ shinãkĩ nõ anã chaka shinãpaima. Jesucristo shinãi keskarari nõ shinãtiro, anã chaka shinãyamakĩ.

<sup>4</sup> Akka yora fetsafãfe ato chakafakakĩ, ãto chaka potakaspakani, a Niospa yoiai keskara shinãkanima, afara chaka fisti shinãmisfo. <sup>5</sup> Jesucristo nai ariax nokoki fotoni nõko chaka noko soaxoxiki. Akka nãatofi afaa chakafamismakĩ. Nã fistifi finakõiakĩ. Ë mato yoiai keskara mã mã tãpiakĩ. <sup>6</sup> Nãskakẽ a afe rafeafãfe chaka shinãmisfoma. Akka a õiti chakayafãfe Jesús tãpiafoma, Jesús shinãkanima. Jesús fe rafeafoma. <sup>7</sup> Ea nikasharakãfe, ã mato yoinõ. Fetsa iskatiro: “Ë Niospa meka mato yoinõ,” ixõ mato yoisharaima. Mato anorima tãpimapai, akka aa nikax mã chaka nitiro. Akka a isharakõixõ shinãsharamis. Aa keskarafi yora sharakõikĩ. A Cristo ika keskarari ari isharakõia shinãsharakõita. <sup>8</sup> Akka nã afara chakafamisfo Satanás fe rafeafo. Nã Satanásmã taeyoi õiti chakaya inino, iskaratĩari nãskara. Nãskaxõ Satanás keyokõi yorafo afara chakafamapai. Nãskakẽ Niospa ãfe Fake nokoki nĩchini. Noko nãxoxiki nokoki fotoni, nõko chaka noko soaxoxiki. Nomakinoa Satanás potatiro noko afara chakafamapaiyaito. Nãskakẽ Jesucristo Satanás finõinĩfofana.

<sup>9</sup> Akka Niospa ãfe Yõshi Shara nõmẽra naneano

nō Niospa fake itiro. Nō Niospa fakexō nō anā afaa chakafapaima. Nā Niospa Yōshi Shara nōko ōiti mēra ikē nō anā afaa chakafatiroma, nōko ōiti noko fetsafaano. Nōko ōiti noko fetsafaxō, mā Niospa noko fakefa. <sup>10</sup> Fetsafāfe afara chakafamisfo, afokai Niospa fakefoma. Afofi aa ranā noinākanima. Askarafo Niospa fakefoma. Afofi Satanás fakefoki. Nāskakē Satanás fakefo nō tāpitiro. Nāskafakīri Niospa fakefo nō tāpitiro.

*Nōa ranā nō noinātiro*

<sup>11</sup> Nāskakē taefakī mā Nios Ifofaxō mā mā nikamiskī mato yoiaito: “Nōa ranā nō noināsharanō,” ixō mato yoiaito mā mā nikamis. <sup>12</sup> Akka nā Caín onefetsa noikaspakī reteni keskara iyamakāfe. Askara Satanás chaka fe rafea. Nāskaxō onefetsa reteni noikaspakī, ē mato yoinō nikakapo. A Niospa yoia keskafakī onefētsa Nios shināni. Akka Caín askanima. Āfe onefetsaki ōitifishkikī reteni. A onefētsa Nios Ifofaito ōikī noikaspakī reteni, Niosri noikaspayanā. <sup>13</sup> Akka māri Jesús Ifofaito, matori noikaspatirofo. “Ē Jesús Ifofaito ea tsōa noikaspaima kiki,” ixō shināyamakāfe. A mā Jesús Ifofaito a Jesús Ifofaafāfema mato noikaspatirofo. <sup>14</sup> Nō yorafo noikōixō nō tāpitiro nōmāi Niospa fakefoxō. Nāskakē a omiskōipakenakafo mēra katama, afe nō ipanaka. Akka a yora fetsafo noikaspai, afokai Niospa fakema. Nios fe rafeamax afe ipanakama. <sup>15</sup> Akka a yorafo noikaspaifo afofi retemitsamis keskarafoki. Afo chakakōifo. Askarafo mā mā tāpia Niospa fakefoma. Askarafo Nios fe rafeafoma. Nios fe nīpanakafoma, yorafo noikaspakanax. <sup>16</sup> Akka Jesús noko noikōikī, noko

nāxoni. Āakōi nokoōnoax nani. Nāskarifiakī nō fetsafo noikōiax nō atoōnoax natiro. <sup>17</sup> Akka afama mīshti ichapayafixō, fetsafāfe afara yopaito nō ato afaa ināmā, askara sharama. Epa Niospa noko noiai keskafakī, nō ato noima. <sup>18</sup> Efe yorafāfe, ea nikakōikāfe, ě mato yoinō. Fetsafo iskakani, āa chanīkani: “Ĕfi yorafo noikai,” ifiaxō ato chakafakani, atokai noikanima. Akka nōfi askaramakī. Nō yorafo noisharakōixō nō ato shara fatiro.

### *Nō Nios nikasharax nō akiki ranotiro*

<sup>19</sup> Akka nō ato noisharakī nō tāpitiro nō fanīrira chaka shinākīma, Jesús nōko Ifokōimāiyakē. Anori shināi nō akiki meseima. <sup>20</sup> Nāskafixō nōko ōiti mēraxō nō shinākī iskafatiro: “Ĕ afara chakafaa,” ixō nō shināito Niospa noko ōi. Noko ōikī tāpia a nō shināi keskara. Nāskakē nōko chaka nō soapaiyaito nōko chaka noko soaxotiro. Nios nōko ōiti keskarama. Aato keyokōi tāpia. <sup>21</sup> Efe yora mīshtichi, ea nikasharakāfe. Nōko ōitinī nō shināi iskatiro: “Ĕ Nios Ifofaito ěfe chaka mā ea soaxona, mā ea shināsharamana,” ixō shināi, nō Nios fe rafetiro, nō akiki nō ranotiro. <sup>22</sup> Nō askaino Epa Nios nokoki inimatiro. Nāskakē nā nō yōkai keskara noko inātiro, a noko yoiai keskaramāi nō nikasharaito, askatarimāi nō inimamasharaito. <sup>23</sup> Iskafakī noko yoini: “Ĕfe Fake Jesucristo nikasharakōikāfe,” ixō noko yoini. Nāskatari a noko yoini keskai nōa ranā nō noināsharai. <sup>24</sup> Akka a Niospa noko yoini keskafakī nō nikasharakōiax Nios fe nō rafekōitiro. Askatari Niosri nofe rafekōitiro. Epa Niospa āfe Yōshi Shara

nokoki nĩchini. Aõxõ nõ tãpitiro Epa Nios nofe ikaito.

## 4

*Niafaka chakata Niospa Yõshi Shara noikaspai.  
Askatari Cristo noikaspai*

<sup>1</sup> Efe yora mĩshtichi, fetsafãfe mato anorima yoiaifãfe ato nikayamakãfe. Iskafakĩ mato yoipaikani: “Nõ mato Niospa meka yoi Niospa noko shinãmanaino,” ifiakaxõ anorima mato yoimisfo. Askaifono Niospa meka õikĩ mã tãpitiro a yoiaifo keskara chanĩmamãkĩ. Niospa Yõshi Sharaõxõ mato yoikanimakĩ. Akka afokai Niospa ato afaa yoiaima. <sup>2</sup> Nãskakẽ ẽ mato yoisharai, ea nikakãfe. Fetsafãfe a Niospa meka mato tãpimasharaito mã tãpitiro. Niospa Yõshi Shara a mẽra naneano yoiaito mã tãpitiro. Iskara mato yoiaito: “Jesucristo ftoni Apa ariax nai mẽranoax. Nãfi yora keskara kãiniki. Aafi yorakõiki,” mato faito mã tãpitiro Niospa shinãmanaino mato askafakĩ yoiaito. <sup>3</sup> Akka yora fetsafãfe anori yoyamaifãfe nõ tãpitiro afãfe Jesucristo noikaspamisfo, Niospa Yõshi Shara ãto mẽra naneama. Satanás ato shinãmamis. Akka a Cristo noikaspai fo noko ano fexikani mã mã nikamis. Akka iskaratĩa mã noko ano feafo, afãfe Cristo noikaspamisfo.

<sup>4</sup> Akka mãroko askaramakĩ efe yorafãfe, Niosfi mãto Ifokõikĩ, mãfi Niospa yorakõifokĩ. ãfe Yõshi Shara mã mãto õiti mẽra nanea. Akka a anorima shinãifo askarafoma, Satanás yõshi ãto õiti mẽra nanea. Akka Niospa Yõshi Shara mato mẽra naneano mã Satanás finõkõia. <sup>5</sup> Akka fetsafãfe

Nios tāpiafomano, nāskakē anorima ato yoimisfo, Satanás ato shināmanaino. Nāskakē Satanás ifo-faafāfe ato nikamis Satanásmāi āto ifokē. <sup>6</sup> Akka nōfi Niospa yorafokī. Nāskakē a Nios tāpiafāfe noko nikakōitirofo nō yoiai anori. Akka a Nios Ifoafāfēma a nō yoiai anori nikatirofoma. Akka nō tāpitiro ato mēra Niospa Yōshi Shara naneano noko nikasharaifono. Ato mēra nanexō fanīrira ato shināmanima. Akka a noko nikaifoma ato mēra Satanás nanea. Satanás ato mēra nanexō fanīrira ato shināmani. Satanás chanī finakōia. Nāskax ōiti chakaya.

### *Niospa noko noikōi*

<sup>7</sup> Efe yora mīshtichi, nō noinākōinō, Niospa noko ato noimanō. Nios fistichi noko shināmatiro nō ato noinō, a fistichimāi noko noikī finakōixō. Nāskakē nō ato noikōikī nō Nios tāpia nō afe yora, nōko ōiti mā noko fetsafaano. <sup>8</sup> Niospa yorafo noikōia. Nāskaxō ato noikī noko tāpimatiro. Akka a yorafo noiaifāfēma, Nios tāpiafoma. <sup>9</sup> Niospa āfe Fake fisti nāmā nīchini, nāmānoax noko nāxoyonō. Nāskakē nō afe nīpaxatiro, nāatomāi nōko chaka noko soaxomiskē. Nāskakē Niospa noko ōimani afeskaxō noko noimākai. <sup>10</sup> Nāskakē nō Nios noi. Akka nō Nios keskarama, nō ato noikī finamisma. Nios fistichi noko noikōimis. Noko noikōikī āfe Fake Jesús nāmā nīchini noko nāxoyonō nōko chaka noko soaxoxiki.

<sup>11</sup> Akka efe yora mīshtichi, Epa Niospa noko noikōi. Nāskakē nōa ranā nōri nō noināsharakōikāfe. <sup>12</sup> Akka tsoa pishta Nios ōimisma. Nāskafiax nō noināino, Nios nōmēra ika. Nofe ixō yorafo noko noimasharatiro. <sup>13</sup> Niospa āfe Yōshi Shara nōmēra ikimakē nō tāpitiro nō Nios

fe rafea, Nios nofe ikano. <sup>14</sup> Epa Niospa nai arixõ ãfe Fake noko nãmã nĩchixonĩ. ãfe Fake nãmãnoa nõ õipaoni. Õipaonixakĩ nõ ato yoimis iskafakĩ: “Epa Niospa ãfe Fake noko nãmã nĩchixonĩ, keyokõĩ nokoõnoax nanõ nõko chaka noko soaxoxiki noko ifiano nõ afe ipaxanõ.” <sup>15</sup> Fetsa iskai: “Jesúsfi Niospa Fakeki,” ixõ shinãĩ. Aafi Nios fe rafeakĩ Nios afe ikano.

<sup>16</sup> Niospa noko noikõia mã nõ tãpia, nõ chanĩmara faiyanã, Niospamãĩ noko noimiskẽ. Nõ Nios chanĩmara faito nofe rafexõ noko yorafo noimatiro. Akka nõ ato noikõiaino Nios nofe ika, afe nõ rafekõia. <sup>17</sup> Nõ Nios noi. Nõ Nios noikĩ finakõiax nõ inimatiro Jesús anã nãmã fotoano. Anã fotoxõ noko iskafatiro: “Nã ea Ifofaafo tii êfe Epa Nios ari fokani. Akka nã ea Ifofaafoma tii êfe Epa ari fokanima, nã omiskõipakenakafo mẽra fokani,” ato fatiro. Ato askafaino nõkai Nioski meseima. Nõ ranoima nõ afe rafekõi. Afe rafei nõ Jesús keskara iki, ãfe õiti keskara nõ iki. Nãskakẽ Jesús oaitĩa nõ akiki meseima. <sup>18</sup> Nõ Nios noikõiax nõ akiki mesetiroma. Nõko shinã mẽraxõ nõ Nios noikĩ finakõixõ nõ rate potatiro. Akka fẽtsa mesekĩ iskafai: “Niospa ea omiskõimani,” ixõ shinãĩ aatokai noikĩ finakõiama. Ato noikõiamax Nioski mesetiromo.

<sup>19</sup> Nõ Nios noiyamatai noko noikĩ taefani. Akka noko taefakĩ noinikẽ iskaratĩari nõri nõ aõ noi. <sup>20</sup> Akka fetsafo iskakani: “Ë Nios noi,” ifiaxõ a Nios Ifofaafo noima, anorima yoimisfo. Mã afe yorafo õifikĩ atokairoko noikatsaxakakĩ, Niosri noisharakanima askara õiroko fakatsaxakakĩ. <sup>21</sup> Niospa noko yoimis: “Ea noixõ nã ea Ifofaafari noikãfe,” noko famis.

## 5

*Nō Nios Ifofakē tsōa noko afaa  
chakafamatiroma*

<sup>1</sup> Jesucristo Niospa Fakekōi. Nokoki nīchini noko nimapakexanō, nōko Ifo inō. Akka nō a chanīmara fai nō Niospa fakefo itiro. Nāskaxō āfe Apa Nios nō noixō, āfe Fakeri nō noikōitiro. <sup>2</sup> Nō Nios noikōikī noko yoiai keskara nō nikai. Nāskaxō mā nō tāpia nō Niospa fakefori noikōi. <sup>3</sup> Nō Nios noikōixō āfe meka nō nikakōikī a noko yoiai keskara nō nikai nō fekaxteima. <sup>4</sup> Nāskakē nō Epa Niospa fakexō afara chakafāfe noko amapaiyai keskarakai nō atiro. Niospa Fake Jesucristo chanīmara faxō afarafāfe noko afara chakafamapaiyai keskara nō finōtiro. <sup>5</sup> Afara chakafo noko amapaiyaifo keskara Niospa noko amatiroma nō anōma. Nāskaxō Jesucristo Niospa Fake nō chanīmara faxō aōxō na chakafo nō finōtiro anā afaa chakafaxikima. Nā chanīmara faafāfe finōtirofo.

*Niospa āfe Fakekōi noko ōimani*

<sup>6</sup> Mā nō tāpia Niospa āfe Fake feronāfakekōi ini. Nā Jesús mā maotisata faka mēra ikipakekafāta kainākafanaino, Epa Niospa yoini iskafakī: “Nafi ēfe Fakeki,” ixō yoini. Jesús naino āfe imi foaino Apa Niospa noko tāpimani āfe Fakemāiakē. Āfe Yōshi Shara chanīmisma nōmēra nanexō noko yoimis Jesús Niospa Fakekōi. <sup>7</sup> Nā trespato yoimisfo Jesús Niospa Fakekōi. <sup>8</sup> Jesús faka mēra maotisini shināta, askatari naino āfe imi foni shināta, askatari Niospa Yōshi Sharapa noko yoiaino, nānorifos nā trespa shināmisfo. <sup>9</sup> Akka

yorafãfe noko afara yoiaito ato chanĩmara fata a Niospa noko yoiairi nõ chanĩmara fakĩ finakõitiro. Akai yora keskarama, afi Nioskõikĩ. Akka ãfe Fakeõnoa noko yoiaito nõ chanĩmara fakõitiro. <sup>10</sup> Akka Niospa Fake chanĩmara faxõ Apa Niospa aõnoa yoini keskara ãfe õiti mëraxõ chanĩmara fatirofo. Nãskafekẽ ãfe Fakeõnoa yoimis keskara tsõa chanĩmara fayamaxõ, “Nios chanĩra,” fakaxõ yorafo fanĩrira shinãmapaikani. <sup>11</sup> Nãskakẽ Nios iskamis: “Ë mato nimasharapaketiro ãfe Fake Jesúsxõ,” ixõ noko iskafamis. Nãskakẽ nõ Jesús Ifofaax nõ afe nĩpaxatiro. <sup>12</sup> A Niospa Fake Ifofaifo afe nĩpaxatirofo. Akka a Ifofaima afe nĩpaxatirofoma.

### *Mã mekai xatekĩ ato yoisharani*

<sup>13</sup> Mã Niospa Fake chanĩmara faaki. Nãskakẽ ã mato kirika kenexoni, mã tãpinõ mã afe nĩpanaka.

<sup>14</sup> Nõ afara sharafo nõ fichipaikĩ, a Niospa noko shinãmanaino, nõ Nios yoitiro kĩfikĩ, a Niospa fichipaiyai keskafakĩ. Nõ askakĩ nõ tãpitiro Niospamã noko nikasharamiskẽ. <sup>15</sup> Nãskakẽ nõ tãpitiro a nõ Nios yoiaito noko nikaito noko nikaxõ noko afara inãtiro nõ yõkaito.

<sup>16</sup> Akka a Nios Ifofaa fẽtsa afara chakafaito õikĩ, a Nios Ifofaa fẽtsa Nios kĩfixotiro ãfe chaka xatenõ. Akka Epa Niospa ato nimatiro isharapakexanõfo. Askafikanax fetsafãfe oa Nios Ifofafo keskara iyokanax mã potakaxõ chaka shinãfãfãikakĩ Nios kachikiri fakõinafo. Askarafokai tsõa ato nimatiroma nĩpaxanõfo. Naax omiskõipakenakafo mërã fokani. Atoõnoa Epa Nios kĩfixokãfe ixõ ã mato yoiama. <sup>17</sup> A Niospa noko yoiã keskara nõ nikayamaxõ nõ chaka shinã. Askafixõ anã nõ

chaka xatepaiyaito òikĩ nõko òiti noko fetsafaxotiro, nõ anã chaka shinãpaiyamanõ.

<sup>18</sup> Mã nõ Nios Ifofaano, noko fakefai. Nõ ãfe fake ixõ nõ tâpia nõ anã chaka shinãpaima, mãmãi noko Niospa òiti fetsafaano. Mã nõ askano Satanás afara anã noko chakafamapaiyaito, Niospa Fakekõichi Jesús noko ifixõ noko kexesharatiro. Noko askafakẽ Satanás noko afeska fatiroma.

<sup>19</sup> Mã nõ tâpia nõ Niospa fake. Akka fetsafãfe Nios nikakaspaifono, afo Satanás ato shinãmani ãto ifo inõfo. <sup>20</sup> Niospa Fake nokoki oni. Noko tâpimaniyoi ãfe Apa nõ tâpisharakõinõ. ãfe Apafi mẽstekõi ikaki. Akka nõ Jesús fe rafeax ãfe Apa feri nõ rafetiro. Nã Jesucristo Niospa Fake. Nãri Nioskõi. Nãskakẽ noko nimapakexatiro.

<sup>21</sup> Efe yora mĩshtichi, Nios fisti Ifofakãfe. Satanás mato afara chakafamapaiyaito afe rafeyamakãfe. Askatari afara chakafo mã ifofapaikĩ afo shinãyamakãfe. Nios fisti shinãkãfe.

Nã tii ã mato kirika kenexõ fomai, efe yora mĩshtichi.

*Ëkĩa Juan*

**Niospa meka fena Jesucristo<sup>noa</sup>**  
**New Testament in Yaminahua (PE:yaa:Yaminahua)**

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 13 Jul 2024 from source files  
dated 29 Jan 2022

6c7b7ce2-9d87-5405-91e6-71ce1387adcc